

<><><><><><>

एह आकाशवाणी जम्मू ऐ, बड्डलै खबरें च तुंदा सुआगत, पैहले खास-खास खबरें कन्नै में प्रोमिला जम्वाल।

Headlines

1. राष्ट्र अज्ज सरदार वल्लभ भाई पटेल हुंदी जयंति, राष्ट्रीय एकता दिवस दे रूपै च मना'रदा ऐ।
2. प्रकाश पर्व देयाली अज्ज पूरे देसै च पूरे जज्बे कन्नै मनाया जा'रदा ऐ। प्रधानमंत्री नरेन्द्र मोदी होरें देशवासिएं गी शुभकामना भेंट कीतियां न।
3. पैहली जुलाई थमां सरकारी मुलाजमें ते पेंशनरें गी बाद्दू 3 प्रतिशत मेंहगाई भत्ता तै मेंहगाई राहत दित्ता जाग।
4. मुखमंत्री उमर अब्दुल्ला होरें शेर कश्मीर अंतर्राष्ट्रीय कान्वेंशन केन्द्र च सिविल समाज कन्नै गल्लबात कीती। जम्मू कश्मीर दी मर्यादा, लोकवाद ते विकास दा पाया प्रण।

हून खबरें दी तफसील कन्नै अभिलाषा शर्मा।

<><><><><><>

President Sardar Patel

राष्ट्र अज्ज वल्लभ भाई पटेल हुंदी जयंति राष्ट्रीय एकता दिवस दे तौर मना करदा ऐ। राष्ट्रपति द्रौपदी मुर्मू होरें अज्ज बड्डलै पटेल चौक च सरदार वल्लभ भाई पटेल होरें गी श्रद्धांजलि भेंट कीती। उपराष्ट्रपति जगदीप धनखड़ होरें बी सरदार वल्लभ भाई पटेल होरें गी श्रद्धांजलि भेंट कीती। राष्ट्र सरदार पटेल हुंदी जयंति गी राष्ट्रीय एकता दिवस दे तौर मना करदा ऐ। उंदी जयंति हर ब'रे 31 अक्तूबर गी मनाई जंदी ऐ। सरदार पटेल होरें भारत दी आजादी दी लड़ाई च अहम भूमिका नभाई ही। ओह आजाद भारत दे पैहले उप-प्रधानमंत्री ते गृहमंत्री रेह। राष्ट्रीय एकता दिवस बक्ख-बक्ख रजवाड़े दे किट्ठा होइयै भारत दी कोशशें गी चेता नुआंदा ऐ।

प्रधानमंत्री नरेन्द्र मोदी होरें सरदार पटेल हुंदी जयंति दे मौके पर आयोजित राष्ट्रीय एकता दिवस कार्यक्रम च शामिल होंगन। ओह एकता दिवस च सरदार पटेल हुंदी प्रतिमा पर पुष्पांजलि भेंट करगन ते एकता दिवस संगंध चुक्कगन। प्रधानमंत्री एकता दिवस च परेड बी दिक्खगन। इस परेड च 9 राज्यें, 1 केन्द्री राज प्रबंधन ते 4 केन्द्रीय सशस्त्र बलें सनें कुल टीमां हिस्सा लै'रदियां न।

<><><><><><>

Diwali

पूरे मुल्खै च अज्ज देयाली दा ध्यार बड़े जोश ते उत्साह कन्नै मनाया जा'रदा ऐ। देयाली दा ध्यार उत्तर प्रदेश च पूरी धार्मिक श्रद्धा ते भावना कन्नै मनाया जा'रदा ऐ। कल अयोध्या च सरियू नदी कंडे दीप-उत्सव मनाया गेआ। इस मौके पर केन्द्री संस्कृति मंत्री गजेन्द्र सिंह शेखावत, राज्य दे मुखमंत्री योगी अदित्यनाथ ते होर दुए गनमान्य व्यक्तिएं सनें ज्हारा बद्धे श्रद्धालु मजूद हे। इस मौके पर बोलदे होई मुखमंत्री योगी आदित्यनाथ होरें आखेआ जे बड़ा खास ऐ जे 22 जनवरी गी 500 ब'रे दे इंतजार मगरा भगवान राम अपने नमें मंदर च आए न। प्रधानमंत्री नरेन्द्र मोदी होरें देशवासिएं गी देयाली दी मुबारकबाद दित्तियां न। इक सोशल मीडिया पोस्ट च श्री मांदी होरें आखेआ जे देयाली दा ध्यार सब्बने देशवासिएं दे जीवन च खुशियां, सेहत ते तरक्की आनै। उनें कामना कीती छे जे सब्बनें जनें गी मां लक्ष्मी ते भगवान गणेश हुंदा आशीवाद प्राप्त होए। उपराज्यपाल मनोज सिन्हा होरें बी देयाली दे ध्यार दी सब्बने गी मुबारकबाद दित्तियां। अपने सनेह च

उपराज्यपाल होरें आखेआ जे इस पावन उत्सव दे मौके पर सब्बने देशवासिएं गी मुबारकबाद। उआं अमरीका आस्सेआ देयाली दा ध्यार मनाने दी घोषणा मगरा वन वर्ल्ड ट्रेड सेंटर गी दीएं कन्नै सजाया गेदा ऐ।

<><><><><><>

Diwali Preparation(byte)

देयाली दी आमद गी दिखदे होई खाद्य सुरक्षा अधिकारिएं दी इक टीम नै रामबन जिले च मिठाई दी दुकानें दा मुआयना कीता। निरीक्षण टीम नै 19 दुकानें दा मुआयना कीता ते गुणवत्ता दे परीक्षण लेई मिठाई, खोआ, लड्डू, सोन पापड़ी बगैरा दे 20 नमूने लैते। एह्दे कन्नै गै दऊं दुकानें गी गैर-स्वच्छता लेई 35 रपे दा चालान कीता गेआ। विभाग आस्सेआ जारी इक विज्ञप्ति च दस्सेआ गेआ ऐ जे एह् मुहिम देयाली दे उत्सव तगर जारी रौह्ग। एह् बी आखेआ गेआ ऐ जे जेकर कोई बी व्यक्ति जां संगठन जेह्ड़ा खाद्य उत्पादें दे उत्पादन प्रोसेसिंग बंड जा बिक्री च शामिल ऐ, गैर कनूनी गतिविधिएं च शामिल पाया जुंदा ऐ ते ओह्दे कन्नै खाद्य सुरक्षा सरबंधी एफएसएस एक्ट तैह्त्त निबड़ेआ जाग। साढ़े संवाददाता कन्नै गल्लबात करदे होई रामबन दे खाद्य सुरक्षा अफसर बलवीर सिंह होरें दस्सेआ

<><><><><><>

DA Hike

पेंशनरें दी भलाई बेहतरी सरबंधी मैह्कमे नै केन्द्रीय कर्मचारिएं ते पेंशनरें दे हित्ते च इक जुलाई थमां डी.ए दी किश्त जारी करने दी घोषण्ण कीती ऐ। केन्द्र मंत्रीमंडल नै 3 फीसदी डी.ए दी किश्त गी मंजूरी दित्ती ऐ। केन्द्र सरकार दे पेंशनर ते परिवारक फंड पेंशन लैने आले पेंशनरें गी हुन 50 फीसदी दी थाहर 53 फीसदी डी.ए थ्होग।

<><><><><><>

Special Trains

ध्यारें दे दिनें गी ध्याने च रखदे होई यात्रुएं दी सहूलत आस्तै भारती रेवले नै जम्मू तवी थमां दऊं आरक्षित फ़ैस्टिवल स्पैशल रेलगड्डियां चलाने दी घोषणा कीती ऐ। आकाशवाणी जम्मू दे संवाददाता दी रिपोट मूजब जम्मू तवी हावड़ा फ़ैस्टिवल स्पैशल रेल 04608 जम्मू तवी थमां हावड़ा तगर चलोग। एह् रेलगड्डी संजा 8 बज्जियै 20एं मिंटें पर जम्मू तवी थमां चलोग ते दऊं दिनें मगरा दपैहरी 1 बज्जियै 20एं मिंटें पर हावड़ा पुज्जी जाग। दूर्ई फ़ैस्टिवन स्पैशल कामाख्या-श्री माता वैष्णो देवी कअरा रेलगड्डी 04679 कामाख्या थमां श्री माता वैष्णो देवी कटरा तगर चलोग।

<><><><><><>

DC-Jammu

जम्मू दे डिप्टी कमीशनर सचिन कुमार वैश्य होरें कल राजस्व मैह्कमे दे अधिकारिएं कन्नै इक बैठक दी अगुवाई कीती जेह्दे च पैह्ले थमां डिजीटीलाइज कीती गेदी जमीनें दे राजस्व रिकार्ड दे सरबंधे च ला'रदी जांच प्रक्रिया दी समीक्षा कीती गेई। डिजीटलीकरण दे बाद मतूदा ध्यान हुन वैब अधारित प्लेटफार्मे पर दित्ता जा'रदा, तां जे बिजन कुसै रूकावट दे उंदे तगर लोकें दी पुज्ज बनी सकै। डीसी होरें पारदर्शिता ते सुचारू सेवा बधाने दी महत्ता पर जोर पाया। उनें इस गल्लै गी उजागर कीता जे एह् रिकार्ड दी ऑनलाइन पुज्ज सार्वजनिक ते सखल्ली होनी लोड़चदी।

<><><><><><>

ते हुन बाकि दिएं खबरें कन्नै प्रोमिला जम्वाल।

SKICC

शेरे—कश्मीर अंतर्राष्ट्रीय कान्वेंशन केन्द्र च मुखमन्त्री उमर अब्दुल्ला होरें सिविल समाज दे मिबरें कन्नै महत्वै आली गल्लबात कीती ते जम्मू कश्मीर दे लोकें दे लगातार विकास लेई मर्यादा ते लोकवादी मुल्लें दे प्रति अपने धेइयै गी परतियै पक्का कीता। गल्लबात व हिससा लैने आलें च बक्ख—बक्ख सेक्टरें जियां बंज, सैलसफा, शिक्षा, उद्योग, सेहत ते ट्रांसपोर्ट , हाउा वोटें ते शकारा मालकें दे प्रतिनिधि न्यायप्रणाली कन्नै सरबन्ध रखने आले सदस्य ते साबका सिविल सर्विस अधिकारिएं मजूद हे। सिविल समाज दे प्रतिनिधिएं अपनिएं व्यापक चिंता ते मशवरे मुखमन्त्री हुंदे कन्नै सांझे कीते। मुखमन्त्री होरें उनें गी त्रोहियै सुनेआ ते पारदर्शिता ते जनकल्याण लेई समर्पित अपनी सरकार दे प्रण पर जोर पाया ऐ। मुखमन्त्री होरें जम्मू कश्मीर दे राज्य दा दर्जा ब्हाल करने पर सकारात्मक गैह् दस्सेआ। हाल च प्रधानमन्त्री ते केन्द्री मंत्रिएं कन्नै लाई दिएं अपनिएं मीटिंगें दा हवाला दिंदे होई उनें दस्सेआ जे उनेंगी प्रधानमन्त्री ते दुए मंत्रिएं पूरा भरोसा दोआए दा ऐ जे केन्द्री सरकार हर उस गैह् दा समर्थन करोग जेह्डी जम्मू कश्मीर दी तरक्की लेई लाभकारी होग।

<><><><><><>

CAPD Minister

खुराक, नागरिक आपूर्ति ते उपभोक्ता मामलें दे मंत्री सतीश शर्मा होरें मैह्कमे दी समीक्षा कीती जेह्दे च उनेंगी सुधारें ते तकनीक दी शुरुआत राएं सार्वजनिक वितरण प्रणाली च होऐ दे पूरे पराते दे टकोह्दे बदलाव बारे दस्सेआ। खुराक, नागरिक आपूर्ति ते उपभोक्ता मामले दे कमीशनर सैक्रेटरी जुबेर अहमद होरें जानकारी दित्ती जे जम्मू कश्मीर च 25 लक्ख 11 ज्हार राशन कार्ड धारक न, जिंदे च 99 लक्ख लाभार्थिएं गी शामिल कीता गेआ ऐ ते उनेंगी 100 फीसदी आधार कन्नै जोड़ेआ गेआ ऐ। उनें अग्वे आखेआ जे एह्दे कन्नै अयोग्य लाभार्थिएं दी पंचान करने ते उनेंगी हटाने च बड़ी मती मदाद हासल होई ऐ। मंत्री होरें हिदायत दित्ती ऐ जे इस प्रणाली गी सखल्ला बनाना जकीनी कीता जा ते एह्दे तैहत उपलब्ध करोआए जा'रदे समेयान दी विविधता उप्पर बी बचार कीता जाग।

<><><><><><>

Rural Development

ग्रामीण विकास विभाग जम्मू दे निदेशक मोहम्मद मुमताज अली होरें राजौरी जिले च कल ग्रामीण विकास सेक्टर तैहत शुरू कीती गेदिएं स्कीमें दी अमलावरी दा व्यापक जायजा लैता। निदेशक होरें प्रधानमन्त्री आवास योजना ग्रातीण, एमजीनरेगा ते आरडीडी दिएं दुइए स्कीमें तैहत ब्लाक सतह पर चला'रदे कम्में दा जायजा लैता। उनें अफसरें गी पीएमएवाई—जी तैहत बनाए जा'रदे घरें गी बेल्ले सिर सपूरा करने लेई फंडे दी समें सिर दस्त्याबी जकीनी करने दी ताकीद कीती। उनें महात्मा गांधी राश्ट्रीय ग्रामीण विकास गारंटी कन्नू एमजीनरेगा दे मुख उद्देश्यें दी उपलब्धि दे संकेतकें के. पी. आईज् दा जायजा लेआ। जियां किन्ने दिनें दा कम्म रोजगार दित्ता गेआ। आधार पर आधारित अदायगी आला सरिस्ता जियो टैगिंग ते बेल्ले सिर अदायगी, कम्मकाज दी रफ्तार, बिलिंग बगैरा।

<><><><><><>

Samba

राज्य कर विभाग दे अमलावरी सींगे नै सांबा जिले च जीएसटी उल्लंघनाएं पर काबू पाने लेई सख्ती कन्नै अमल करने आली इक मुहिम दी शुरुआत कीती। विशेष तौर पर तम्बाकू पर कीती जा'रदी जीएसटी चोरी बारे विभाग नै अक्टूबर म्हीने जीएसटी दी उल्लंघना करने आलें पर 37 लक्ख 37 ज्हार 358 रुपें दा जुर्माना आमद कीता। विभाग नै अक्टूबर म्हीने 36 ज्हार ई—विलें दी व्यापक जांच कीती। इन्नी बड्डश्र सतह पर चलाई गेदी इस मुहिम कन्नै विभाग दा प्रांतै च जीएसटी बाकायदगिएं गी पूरे प्रण कन्नै लागू करने दा धेइयै बांदे होंदा ऐ।

<><><><><><>

Soil Health

कृषि उत्पादन ते करसान कल्याण निदेशालय जम्मू आस्सेआ जिला कठुआ दी हीरानगर तैहसील दे दन्न मोरियां ग्रां च 50एं करसानें ते ग्ररमीण नोजवानें लेई सायल हैल्थ प्रबंधन बारे दऊं दिनें दे इक सिखलाई प्रोग्राम दा सरिस्ता कीता गेआ। इस प्रोग्राम दा आयोजन जेकेएसएलआरआई दे एचएडीपी प्रोजेक्ट तैह्त् कीता गेआ। पैह्ले दिन ट्रेनिंग प्रोग्राम दा उद्घाटन एमएलए हीरानगर एडवोकेट विजय कुमार शर्मा होरें कीता।

<><><><><><>